

SLUŽBENI GLASNIK

BRČKO DISTRIKTA

BOSNE I HERCEGOVINE

Godina XX – Broj 16

Petak, 21. jun 2019. godine
BRČKO

Bosanski jezik

235

Na osnovu člana 31 stava 1 tačke n) Poslovnika o radu Skupštine Brčko distrikta BiH – prečišćeni tekst (Službeni glasnik Brčko distrikta BiH, broj 54/18), donosim

ODLUKU

O PROGLAŠENJU ZAKONA O LIKVIDACIONOM POSTUPKU

Član 1

Proglašavam Zakon o likvidacionom postupku, koji je usvojila Skupština Brčko distrikta BiH na 51. redovnoj sjednici održanoj 19. juna 2019. godine.

Član 2

Ova odluka bit će objavljena u Službenom glasniku Brčko distrikta BiH.

Broj: 01.1-02-98/19
Brčko, 19. 6. 2019. godine

**PREDSJEDNIK
SKUPŠTINE BRČKO DISTRIKTA BiH**
Esed Kadrić, s. r.

Na osnovu člana 22 Statuta Brčko distrikta Bosne i Hercegovine – prečišćeni tekst (Službeni glasnik Brčko distrikta Bosne i Hercegovine, broj 2/10), Skupština Brčko distrikta Bosne i Hercegovine, na 51. redovnoj sjednici održanoj 19. juna 2019. godine, usvaja

ZAKON O LIKVIDACIONOM POSTUPKU

DIO PRVI - OSNOVNE ODREDBE

Član 1

(Predmet zakona)

Ovim zakonom uređuje se likvidacioni postupak koji se provodi nad pravnim licima, pred Osnovnim sudom Brčko distrikta Bosne i Hercegovine.

Član 2

(Svrha i predmet likvidacionog postupka)

- (1) Likvidacioni postupak služi potpunom namirenju svih povjerilaca pravnog lica unovčenjem njegove imovine.
- (2) Nakon provedenog likvidacionog postupka i namirenja povjerilaca, preostala imovina pravnog lica dijeli se članovima srazmjerno njihovim vlasničkim udjelima.

Član 3

(Nadležni sud)

Likvidacioni postupak provodi Osnovni sud Brčko distrikta Bosne i Hercegovine (u daljnjem tekstu: sud).

Član 4

(Primjena Zakona o stečaju)

- (1) Odredbe Zakona o stečaju shodno se primjenjuju i na likvidacioni postupak, ako ovim zakonom nije drugačije određeno.
- (2) U likvidacionom postupku neće se primjenjivati odredbe Zakona o stečaju kojima se uređuje:
 - a) restrukturiranje i reorganizacija dužnika,
 - b) skupština i odbor povjerilaca,
 - c) pobijanje pravnih radnji,
 - d) ročište za glavnu diobu.

Član 5

(Vrste likvidacionog postupka)

- Vrste likvidacionog postupka su:
- a) prinudni likvidacioni postupak,
 - b) dobrovoljni likvidacioni postupak,
 - c) likvidacioni postupak po službenoj dužnosti,
 - d) likvidacioni postupci utvrđeni drugim zakonima.

Član 6

(Prinudni likvidacioni postupak)

- (1) Prinudni likvidacioni postupak se pokreće ako je pravnom licu izrečena mjera zabrane obavljanja djelatnosti pravosnažnim rješenjem nadležnog organa ili rješenjem suda zbog neispunjavanja uslova za obavljanje djelatnosti, a u roku određenom u izrečenoj mjeri ne ispuni te uslove, odnosno ne promijeni djelatnost ili je izrečena mjera trajne zabrane obavljanja djelatnosti.
- (2) Prijedlog za prinudni likvidacioni postupak pokreće nadležni organ koji je donio rješenje kojim je izrečena mjera zabrane obavljanja djelatnosti.
- (3) Ukoliko sud donese mjeru zabrane djelatnosti pravnom licu, prijedlog za prinudni likvidacioni postupak podnosi nadležni organ koji je pokrenuo postupak s izricanjem mjere zabrane obavljanja djelatnosti.

Član 7

(Dobrovoljni likvidacioni postupak)

- (2) Dobrovoljni likvidacioni postupak se provodi na osnovu odluke o prestanku pravnog lica, koju donosi ovlašten organ pravnog lica određen posebnim zakonom odnosno osnivačkim aktom ili statutom pravnog lica.

(3) Dobrovoljni likvidacioni postupak se može provesti u redovnom likvidacionom postupku ili skraćenom likvidacionom postupku, koji je propisan ovim zakonom.

(4) Prijedlog za pokretanje dobrovoljnog likvidacionog postupka podnosi član pravnog lica ili lice ovlašteno za zastupanje pravnog lica, u skladu s odlukom iz stava 1 ovog člana.

Član 8

(Likvidacioni postupak po službenoj dužnosti)

Likvidacioni postupak po službenoj dužnosti se pokreće dostavom likvidacionom sudu pravosnažnog rješenja registarskog suda kojim je utvrđen prestanak nakon isteka roka na koje je društvo osnovano ili društvo nije izvršilo usklađivanje sa Zakonom o preduzećima Brčko distrikta Bosne i Hercegovine ili ako je pravosnažnom odlukom suda utvrđena ništavost upisa osnivanja u sudski registar pravnog lica.

Član 9

(Likvidacioni postupci utvrđeni drugim zakonima)

Ako je drugim zakonima propisano pokretanje likvidacionog postupka, prijedlog za pokretanje likvidacionog postupka podnose lica određena tim zakonom.

DIO DRUGI - ORGANI LIKVIDACIONOG POSTUPKA

Član 10

(Organi likvidacionog postupka)

Organi likvidacionog postupka su: likvidacioni sudija i likvidacioni upravnik.

Član 11

(Likvidacioni sudija)

Dužnosti likvidacionog sudije su da:

- vođi i upravlja likvidacionim postupkom od dana podnošenja prijedloga za otvaranje likvidacionog postupka do zaključenja likvidacionog postupka,
- pri postupku iz tačke a) ovog člana vrši prava i obaveze, u skladu s odredbama ovog zakona,
- vrši pravni nadzor nad radom likvidacionog upravnika u skladu s ovim zakonom,
- razrješava dužnosti likvidacionog upravnika u skladu s članom 15 ovog zakona.

Član 12

(Likvidacioni upravnik)

(1) Za likvidacionog upravnika sud može na prijedlog podnosioca prijedloga za otvaranje likvidacionog postupka (u daljnjem tekstu: predlagač), imenovati članove uprave pravnog lica, koji su upisani u registar, kao lica ovlaštena za zastupanje.

(2) Ako predlagač nije predložio lice za likvidacionog upravnika, sud imenuje likvidacionog upravnika s liste stečajnih upravnika.

Član 13

(Imenovanje likvidacionog upravnika)

(1) Likvidacioni upravnik stiče svojstvo lica ovlaštenog za zastupanje pravnog lica danom objave rješenja o otvaranju likvidacionog postupka i imenovanju likvidacionog upravnika.

(2) Rješenje iz stava 1 ovog člana objavljuje se na oglasnoj tabli suda i internet stranici suda, dok se oglas o donošenju rješenja o otvaranju likvidacionog postupka i imenovanju likvidacionog upravnika objavljuje u „Službenom glasniku BiH“ i „Službenom glasniku Brčko distrikta BiH“.

(3) Nakon otvaranja likvidacionog postupka, u registru se uz firmu ili naziv pravnog lica upisuje i dodaje oznaka „u likvidaciji“, a u rubrici „Lica ovlaštena za zastupanje subjekta upisa“, upisuje se likvidacioni upravnik.

Član 14

(Obaveze likvidacionog upravnika)

(1) Likvidacioni upravnik je dužan odmah nakon stupanja na dužnost, a najkasnije u roku od 30 dana od dana imenovanja, sudu dostaviti:

- popis imovine,
- popis povjerilaca,
- početni bilans,

d) uvjerenje Porezne uprave Brčko distrikta Bosne i Hercegovine (u daljnjem tekstu: Porezna uprava) o izmirenim poreznim obavezama, ne starije od 15 dana od dana podnošenja prijedloga za pokretanje likvidacionog postupka, ako isto nije dostavio predlagač,

e) uvjerenje Uprave za indirektno oporezivanje Bosne i Hercegovine (u daljnjem tekstu: Uprava za indirektno oporezivanje) o izmirenim obavezama po indirektnim porezima, ne starije od 15 dana od dana podnošenja prijedloga za pokretanje likvidacionog postupka, ako isto nije dostavio predlagač,

f) potvrdu Centralne banke Bosne i Hercegovine (u daljnjem tekstu: Centralna banka) o stanju poslovnog računa, ne stariju od osam dana od dana podnošenja prijedloga za pokretanje likvidacionog postupka, ako istu nije dostavio predlagač.

(2) Likvidacioni upravnik je dužan prilikom dostave sudu popisa imovine, početnog bilansa i popisa povjerilaca, pisanom izjavom garantovati tačnost i potpunost podataka.

(3) Likvidacioni upravnik je dužan ući u posjed imovine likvidacionog dužnika, istu unovčiti, te nakon okončane diobe, dostaviti sudu izvještaj o izvršenoj diobi i priložiti dokumentaciju o provedenoj diobi i namirenju povjerilaca.

Član 15

(Razrješenje likvidacionog upravnika)

Sud može razriješiti imenovanog likvidacionog upravnika ukoliko:

- ne ispunjava obaveze iz člana 14 ovog zakona,
- ne dostavlja izvještaje,
- ne unovčava imovinu,
- neosnovano odugovlači provođenje pojedinih radnji,
- daje netačne podatke,
- u drugim slučajevima po ocjeni suda.

Član 16

(Naknada troškova i nagrada za rad likvidacionog upravnika)

(1) Likvidacioni upravnik, izuzev člana uprave društva, ima pravo na primjerenu naknadu troškova i nagradu za rad.

(2) Naknadu troškova i nagradu za rad određuje sud u skladu s Pravilnikom o nagradama i naknadama za likvidacione upravnike, koji donosi Pravosudna komisija Brčko distrikta Bosne i Hercegovine (u daljnjem tekstu: Pravosudna komisija).

Član 17

(Polaganje računa o radnjama likvidacionog upravnika)

Likvidacioni upravnik je dužan na traženje suda, ali najkasnije s okončanjem postupka diobe, položiti račun o svojim radnjama i sudu predati pismene potvrde na provjeru.

Član 18

(Odgovornost likvidacionog upravnika prema članovima)

Likvidacioni upravnik odgovara za štetu koju pričinu u vršenju svoje dužnosti članovima pravnog lica, po opštim pravilima o odgovornosti za štetu i u rokovima zastare propisanim Zakonom o obligacionim odnosima.

Član 19

(Odgovornost likvidacionog upravnika prema povjeriocima)

(1) Nakon što je pravno lice brisano iz registra, ne mogu se pobijati radnje likvidacionog upravnika, ali povjerioci mogu od njega tražiti da im nadoknadi štetu koju im je svojim radnjama prouzrokovao u likvidacionom postupku.

(2) Likvidacioni upravnik odgovara za štetu prouzrokovanu u toku likvidacionog postupka namjerno ili iz krajnje nepažnje do visine peterostrukog iznosa nagrade koju je primio za svoj rad.

(3) Ako to ne bi bilo dovoljno za namirenje štete koja je nastala povjeriocu usljed radnje likvidacionog upravnika, za nju solidarno odgovaraju svi članovi pravnog lica do visine imovine koja im je isplaćena ili preostala nakon zaključenja likvidacionog postupka, osim u skraćenom dobrovoljnom likvidacionom postupku.

(4) Ne smatra se štetom ako povjerilac blagovremeno ne prijavi svoje potraživanje za koje likvidacioni upravnik nije znao, niti je mogao znati.

(5) Potraživanje povjerioca prema likvidacionom upravniku zastarijeva u rokovima propisanim Zakonom o obligacionim odnosima.

DIO TREĆI – OPŠTE PROCESNE ODREDBE

Član 20

(Pokretanje likvidacionog postupka)

(1) Likvidacioni postupak provodi Osnovni sud ukoliko se na području Brčko distrikta BiH nalazi sjedište pravnog lica.

(2) Prijedlog za otvaranje likvidacionog postupka mogu podnijeti lica ovlaštena ovim zakonom, shodno vrsti likvidacionog postupka.

(3) Likvidacioni postupak je hitan, kao i svi postupci u kojima je likvidacioni dužnik nad kojim je otvoren likvidacioni postupak stranka u postupku.

(4) U likvidacionom postupku ne može se podnijeti prijedlog za povraćaj u predašnje stanje, prijedlog za ponavljanje postupka, niti izjaviti revizija.

Član 21

(Odluke suda)

(1) Odluke u likvidacionom postupku donose se u obliku rješenja ili zaključka.

(2) Zaključkom se izdaje nalog za izvršenje pojedinih radnji.

Član 22

(Pravo na žalbu)

(1) Protiv rješenja može se izjaviti žalba u roku od osam dana, osim ako ovim zakonom nije drugačije određeno.

(2) Početak roka za izjavljivanje žalbe za lica koja imaju pravni interes teče nakon isteka pet radnih dana od dana objave oglasa o donošenju odluke suda u „Službenom glasniku BiH“ i „Službenom glasniku Brčko distrikta BiH“.

(3) Ako je ovim zakonom propisano da se rješenje mora dostaviti određenim licima, rok za izjavljivanje žalbe teče od dana dostavljanja rješenja.

(4) Protiv zaključka se ne može izjaviti žalba, niti prigovor.

DIO ČETVRTI - TOK LIKVIDACIONOG POSTUPKA DOBROVOLJNI LIKVIDACIONI POSTUPAK

Član 23

(Pokretanje postupka)

(1) Likvidacioni postupak se pokreće podnošenjem prijedloga sudu.

(2) Prijedlog za pokretanje likvidacionog postupka se podnosi na obrascu koji će propisati Pravosudna komisija.

Član 24

(Dostava dokumentacije uz prijedlog)

(1) Uz prijedlog za pokretanje likvidacionog postupka sudu predlagač dostavlja:

- a) odluku o prestanku pravnog lica ili
- b) pravosnažno rješenje nadležnog organa kojim je izrečena zabrana obavljanja djelatnosti ili
- c) pravosnažno rješenje nadležnog registarskog suda kojim je utvrđen prestanak ili
- d) pravosnažnu odluku nadležnog organa kojom je utvrđen prestanak.

(2) Uz prijedlog za pokretanje likvidacionog postupka dostavlja se i:

- a) aktuelni izvod iz sudskog registra,
- b) uvjerenje Porezne uprave o izmirenim poreznim obavezama, ne starije od 15 dana od dana podnošenja prijedloga za pokretanje likvidacionog postupka,
- c) uvjerenje Uprave za indirektno oporezivanje o izmirenim indirektnim poreznim obavezama, ne starije od 15 dana

od dana podnošenja prijedloga za pokretanje likvidacionog postupka,

- d) potvrdu Centralne banke o stanju poslovnog računa, ne stariju od osam dana od dana podnošenja prijedloga za pokretanje likvidacionog postupka,
- e) finansijske izvještaje o poslovanju.

Član 25

(Dopuna dokumentacije)

(1) Ako predlagač ne dostavi prijedlog u skladu s članovima 23 i 24 ovog zakona, sud će rješenjem pozvati predlagača da u roku od 15 dana od dana prijema rješenja uredi i dopuni prijedlog.

(2) Ako predlagač ne postupi u skladu sa stavom 1 ovog člana sud će rješenjem prijedlog odbaciti.

(3) Sud može izmijeniti svoje rješenje ako su uz žalbu priloženi dokumenti i isprave kojima se ispunjavaju uslovi iz članova 23 i 24 ovog zakona.

Član 26

(Predujam troškova postupka)

(1) Predlagač je obavezan da uplati predujam u iznosu koji odredi sud za pokriće troškova likvidacionog postupka.

(2) Ako predlagač ne uplati predujam u roku od 15 dana od dana prijema poziva da uplati predujam, likvidacioni sudija će rješenjem odbaciti prijedlog za pokretanje likvidacionog postupka.

Član 27

(Rješenje o otvaranju likvidacionog postupka)

(1) Nakon što razmotri prijedlog za pokretanje likvidacionog postupka i utvrdi osnovanost istog, sud donosi rješenje o otvaranju likvidacionog postupka i imenuje likvidacionog upravnika.

(2) Rješenje o otvaranju likvidacionog postupka sadrži:

- a) firmu, sjedište i MBS pravnog lica, te porezni ID broj i oznaka „u likvidaciji“,
- b) ime i adresu likvidacionog upravnika,
- c) poziv povjericima da u roku od 30 dana od dana objavljivanja rješenja u „Službenom glasniku BiH“ i „Službenom glasniku Brčko distrikta BiH“ prijave sudu svoja potraživanja uz pouku da ukoliko u ostavljenom roku niko od povjerilaca ne prijavi potraživanje sud će likvidacioni postupak zaključiti,
- d) nalog likvidacionom upravniku da postupi u skladu s članom 14 ovog zakona,
- e) nalog sudskom registru poslovnih subjekata da izvrši upis zabilježbe rješenja o otvaranju likvidacionog postupka s naznakom „u likvidaciji“, te brisanje ostalih lica upisanih u sudskom registru koja su ovlaštena za zastupanje i upis likvidacionog upravnika,
- f) mjesto, dan i vrijeme ročišta za ispitivanje potraživanja,
- g) troškovi postupka.

(3) Dispozitiv rješenja iz ovog člana objavljuje se u „Službenom glasniku BiH“ i „Službenom glasniku Brčko distrikta BiH“.

(4) Ovo rješenje će likvidacioni sudija po službenoj dužnosti dostaviti sudskom registru.

Član 28

(Pravne posljedice otvaranja likvidacionog postupka)

(1) Danom donošenja rješenja o otvaranju likvidacionog postupka prekidaju se svi postupci u kojima je likvidacioni dužnik stranka u postupku.

(2) Ovlaštenja licima ovlaštenim za zastupanje prestaju danom donošenja rješenja o otvaranju likvidacionog postupka.

Član 29

(Obustava postupka)

(1) Ukoliko likvidacioni upravnik ne postupi u roku i u skladu s članom 14 ovog zakona, sud će ga zaključkom pozvati da u dodatnom roku od 15 dana postupi u skladu s članom 14 ovog zakona.

(2) Zaključak iz stava 1 ovog člana sud će dostaviti na adresu sjedišta pravnog lica.

(3) Ukoliko likvidacioni upravnik ne postupi ni u naknadnom roku, sud će donijeti rješenje o obustavi likvidacionog postupka. U slučaju obustave likvidacionog postupka pravne posljedice otvaranja likvidacionog postupka ostaju na snazi.

Član 30

(Ispitivanje prijava potraživanja)

(1) Na ročištu za ispitivanje prijava potraživanja (ispitnom ročištu) likvidacioni upravnik će se izjasniti da li priznaje potraživanje ili ga osporava.

(2) Ukoliko je prijava potraživanja osporena od strane likvidacionog upravnika, sud će povjerioca uputiti da može pokrenuti parnicu radi utvrđenja osnovanosti potraživanja. Parnicu je dužan pokrenuti u roku od 30 dana od dana održavanja ročišta za ispitivanje potraživanja.

Član 31

(Zaključivanje likvidacionog postupka)

Ako se niko od povjerilaca ne prijavi u ostavljenom roku, na prijedlog likvidacionog upravnika i nakon što likvidacioni upravnik da izjavu kojom jamči da likvidacioni dužnik nema obaveza, sud će zaključiti likvidacioni postupak.

Član 32

(Preuzimanje imovine)

(1) Likvidacioni upravnik je dužan bez odlaganja ući u posjed imovine pravnog lica i ovlašten je i obavezan na unovčenje imovine. Prava trećih lica na predmetima i pravima imovine se moraju uzeti u obzir.

(2) Prije unovčenja imovine likvidacioni upravnik je dužan izvršiti procjenu nekretnina i pokretnih stvari značajnije vrijednosti, putem ovlaštenog sudskog vještaka.

Član 33

(Unovčenje nepokretnosti bez tereta)

(1) Prodaja nepokretnosti koje nisu opterećene teretima (slobodna imovina) vrši likvidacioni upravnik javnim nadmetanjem, javnim prikupljanjem ponuda i neposrednom pogodbom.

(2) Likvidacioni upravnik s kupcem zaključuje ugovor o prodaji nekretnine notarski obrađen, te istog uvodi u posjed nekretnine.

(3) Ukoliko se nepokretnost ne proda na način propisan u stavu 1 ovog člana prodaja će se izvršiti u skladu s članom 34 ovog zakona.

Član 34

(Unovčavanje nepokretnosti s teretima)

(1) Ako je nepokretnost opterećena razlučnim pravom, unovčava se javnim nadmetanjem, javnim prikupljanjem ponuda i neposrednom pogodbom.

(2) U oglasu o prodaji nepokretnosti likvidacioni upravnik objavljuje vrijednost nepokretnosti, način prodaje i uslove prodaje.

(3) Na prvoj javnoj prodaji nepokretnost se ne može prodati ispod 1/2 procijenjene vrijednosti, a na drugoj javnoj prodaji ispod 1/3 procijenjene vrijednosti.

(4) Ako se ne uspije unovčiti nepokretnost s teretom na dvije javne prodaje, postupak prodaje se ne obustavlja.

(5) Ako se nepokretnost nije mogla unovčiti po cijeni određenoj u stavu 3 ovog člana, na svakoj narednoj javnoj prodaji najniža cijena po kojoj se nepokretnost može unovčiti smanjuje se za 10 % od prethodne vrijednosti.

(6) Za prodaju nepokretnosti s teretom javnim nadmetanjem ili javnim prikupljanjem ponuda ili neposrednom pogodbom, potrebna je saglasnost razlučnog povjerioca.

(7) Ukoliko je nepokretnost opterećena teretima sud će na prijedlog likvidacionog upravnika nakon prodaje rješenjem naložiti brisanje tereta.

Član 35

(Zaključenje ugovora i brisanje tereta)

(1) Nepokretnosti unovčava likvidacioni upravnik, koji s kupcem koji izlicitira odnosno ponudi i uplati najvišu cijenu,

zaključuje kod notara ugovor o kupoprodaji i na kupca prenosi prava na nepokretnostima, te istog uvodi u posjed nepokretnosti.

(2) Ako je nepokretnost opterećena teretima, sud će na prijedlog likvidacionog upravnika rješenjem naložiti brisanje tereta.

(3) Odredbe članova od 33 do 35 stava 1 i stava 2 ovog zakona, shodno se primjenjuju na prodaju brodova, aviona, te prava upisanih u javnim evidencijama.

Član 36

(Obezbjedenje prodaje (depozit))

(1) Obezbjedenje (depozit) prodaje određuje likvidacioni upravnik i isti ne može iznositi više od 10 % procijenjene vrijednosti predmeta prodaje, s tim da taj iznos ne može biti veći od 50.000 KM.

(2) Obezbjedenje (depozit) ne vraća se kupcu koji je izlicitirao i prihvatio kupoprodajnu cijenu, a nije je uplatio u određenom roku.

Član 37

(Prodaja pokretnih stvari)

Likvidacioni upravnik će unovčiti pokretne stvari bez tereta javnim nadmetanjem, javnim prikupljanjem ponuda i neposrednom pogodbom, ako pokretnu stvar ima u svom posjedu.

Član 38

(Unovčavanje pokretnih stvari i prava na kojima postoji razlučno pravo)

(1) Likvidacioni upravnik može unovčiti pokretne stvari na kojima postoji razlučno pravo javnim nadmetanjem, javnim prikupljanjem ponuda i neposrednom pogodbom, ako pokretnu stvar ima u svom posjedu i ako za taj način unovčenja dobije saglasnost razlučnog povjerioca.

(2) Likvidacioni upravnik može naplatiti ili na drugi način unovčiti potraživanje koje je likvidacioni dužnik ustupio ili založio radi obezbjeđenja nekog prava.

(3) Ako likvidacioni upravnik ima pravo na unovčenje pokretne stvari, u skladu sa stavom 1 ovog člana, dužan je razlučnom povjeriocu na njegov zahtjev dati obavještenje o stanju pokretne stvari ili dozvoliti da povjerilac razgleda pokretnu stvar.

(4) Ako je likvidacioni upravnik ovlašten za naplatu potraživanja, u skladu sa stavom 2 ovog člana, dužan je razlučnom povjeriocu na njegov zahtjev dati obavještenje o potraživanju.

(5) Umjesto obavještenja, likvidacioni upravnik može povjeriocu dozvoliti uvid u knjige i poslovnu dokumentaciju likvidacionog dužnika.

Član 39

(Obavijest o namjeri otuđenja)

(1) Prije nego što likvidacioni upravnik otuđi trećem licu pokretnu stvar ili pravo na čije unovčavanje je ovlašten, u skladu s članom 38 ovog zakona, dužan je razlučnog povjerioca obavijestiti na koji način namjerava da otuđi pokretnu stvar.

(2) Likvidacioni upravnik je dužan povjeriocu dati priliku da u roku od osam dana predloži povoljnije unovčavanje pokretne stvari uz predočavanje konkretne ponude s uputom na platežnu sposobnost kupca.

(3) Ako razlučni povjerilac u roku iz stava 2 ovog člana ili blagovremeno prije otuđenja predloži povoljniju mogućnost unovčavanja, likvidacioni upravnik je dužan da iskoristi mogućnost unovčavanja koju je naveo povjerilac ili da unovči pokretnu stvar tako da ne ošteti razlučnog povjerioca.

(4) Unovčavanje se, osim načina unovčavanja iz stava 2 ovog člana, može izvršiti na način da razlučni povjerilac preuzme pokretnu stvar ako to nije suprotno interesima drugih povjerilaca.

Član 40

(Podjela ostvarenog iznosa kod pokretnih stvari na kojim postoji razlučno pravo)

(1) Nakon što likvidacioni upravnik unovči pokretnu stvar na kojoj postoji razlučno pravo, ostvareni iznos od unovčenja se najprije koristi za namirenje troškova likvidacionog postupka, a

ostatak ostvarenog iznosa koristi se za namirenje različnih povjerilaca bez odgađanja.

(2) Ako je pokretnu stvar na kojoj postoji razlučno pravo likvidacioni upravnik prenio na razlučno povjerioca, razlučni povjerilac je obavezan da uplati iznos koji je potreban za namirenje troškova likvidacionog postupka.

(3) Ako je zbog unovčavanja iz stava 2 ovog člana likvidaciona masa opterećena porezom, iznos poreza pridodaje se troškovima unovčavanja.

Član 41

(Zaštita povjerioca od odugovlačenja unovčavanja)

(1) Ako je likvidacioni upravnik ovlašten za unovčavanje stvari na kome postoji razlučno pravo i ako namjerno odugovlači unovčavanje nakon ročišta, na prijedlog razlučnog povjerioca će se iz likvidacione mase nadoknaditi gubitak vrijednosti njegovog udjela u unovčavanju.

(2) Ako dođe do isplate štete razlučnom povjeriocu iz likvidacione mase, zbog razloga iz stava 1 ovog člana, ostali povjerioci mogu tražiti da im likvidacioni upravnik nadoknadi štetu.

Član 42

(Unovčavanje pokretnih stvari i potraživanja na kojima postoji razlučno pravo od strane povjerioca)

(1) Razlučni povjerilac je ovlašten za unovčavanje pokretne stvari ili potraživanja na kojima postoji razlučno pravo, ako pokretnu stvar ima u posjedu ili ako je likvidacioni upravnik prepustio potraživanje na unovčavanje.

(2) Razlučni povjerilac je dužan pokretnu stvar unovčiti u skladu s članom 38 ovog zakona.

(3) Na zahtjev likvidacionog upravnika i nakon saslušanja povjerioca, likvidacioni sudija može odrediti rok, unutar kojeg razlučni povjerilac mora unovčiti pokretnu stvar, s tim da nakon proteka roka, pravo na unovčavanje pokretne stvari stiče likvidacioni upravnik.

Član 43

(Dioba)

(1) Iz likvidacione mase likvidacioni upravnik je dužan prvo izmiriti troškove likvidacionog postupka.

(2) Ako su potraživanja povjerilaca za koje ne postoji izvršni naslov sporna, na prijedlog likvidacionog upravnika sud će tog povjerioca uputiti da pokrene parnicu u roku od 30 dana od održavanja ročišta, radi dokazivanja osnovanosti potraživanja.

(3) Ako povjerilac u ostavljenom roku pokrene parnicu, likvidacioni upravnik obezbjeđuje sredstva radi eventualne isplate te obaveze, ako ima na raspolaganju dovoljno sredstava.

(4) Ako ne postoji dovoljno raspoloživih sredstava za obezbjeđenje, likvidacioni upravnik neće vršiti diobu do pravosnažnog okončanja parničnih postupaka.

(5) Ako povjerilac u ostavljenom roku ne pokrene parnicu iz stava 2 ovog člana, njegovo se potraživanje prilikom diobe neće uzeti u obzir.

(6) Likvidacioni upravnik nakon unovčenja imovine, u potpunosti namiruje potraživanja svih povjerilaca ukoliko je likvidaciona masa dovoljna za namirenje svih potraživanja.

Član 44

(Ostatak likvidacione mase)

(1) Ako nakon namirenja troškova likvidacionog postupka i potpunog namirenja povjerilaca preostane imovina ili prava, ista se uručuje članovima pravnog lica srazmjerno njihovim vlasničkim udjelima ili njihovoj odluci o raspodjeli ostatka likvidacione mase.

(2) Ako su članovi pravnog lica, strana fizička ili pravna lica, a ostatak likvidacione mase predstavlja nepokretnost, ista će se članovima pravnog lica uručiti u skladu s odredbama posebnog zakona koji reguliše pitanje sticanja svojine stranih pravnih lica na nepokretnostima u Brčko distriktu BiH.

(3) Ako nisu ispunjeni uslovi za sticanje prava na nepokretnostima, utvrđeni posebnim zakonom, likvidacioni upravnik će izvršiti unovčenje imovine i uručiti ostatak likvidacione mase u skladu sa stavom 1 ovog člana.

Član 45

(Podnošenja prijedloga za otvaranje stečajnog postupka)

(1) Ako likvidacioni upravnik na osnovu prijavljenih potraživanja utvrdi da imovina poslovnog subjekta nije dovoljna da se podmire sva potraživanja povjerilaca, likvidacioni upravnik je dužan odmah a najkasnije u roku od 15 dana od dana saznanja podnijeti prijedlog da se likvidacioni postupak obustavi i pokrene stečajni postupak.

(2) O prijedlogu likvidacionog upravnika za obustavu likvidacionog postupka i provođenje stečajnog postupka, sud će odlučiti rješenjem nakon izjašnjenja prisutnih povjerilaca na ročištu za ispitivanje povjerilaca.

(3) Protiv ovog rješenja nije dozvoljena žalba.

(4) Likvidacioni upravnik odgovara za štetu koju povjeriocima ili članovima pravnog lica nanese zbog nepodnošenja ili zakašnjelog podnošenja prijedloga za otvaranje stečajnog postupka.

Član 46

(Obaveza podnošenja izvještaja i polaganje računa)

Likvidacioni upravnik je dužan sudu dostaviti prijedlog načina diobe, te po okončanom postupku diobe dostaviti izvještaj o svim radnjama provedenim tokom postupka s dokazima o izvršenom namirenju povjerilaca i izvještaj o troškovima postupka.

Član 47

(Rješenje o zaključenju likvidacionog postupka)

(1) Nakon podnošenja izvještaja iz člana 46 ovog zakona, sud će donijeti rješenje o zaključenju likvidacionog postupka i razrješenju likvidacionog upravnika, te naložiti brisanje poslovnog subjekta iz sudskog registra.

(2) Rješenje o zaključenju likvidacionog postupka objavljuje se na oglasnoj tabli suda, dok se oglas o donošenju rješenja o zaključenju likvidacionog postupka objavljuje u „Službenom glasniku BiH“ i „Službenom glasniku Brčko distrikta BiH“ uz napomenu da je rješenje objavljeno na oglasnoj tabli suda u neprekidnom trajanju od 30 dana.

Član 48

(Brisanje iz registra)

Po pravosnažnosti rješenja o zaključenju likvidacionog postupka sud će rješenje dostaviti registru poslovnih subjekata radi brisanja.

DIO PETI - SKRAĆENI DOBROVOLJNI LIKVIDACIONI POSTUPAK

Član 49

(Skraćeni dobrovoljni likvidacioni postupak)

(1) Skraćeni dobrovoljni likvidacioni postupak pokreće se podnošenjem prijedloga za provođenje dobrovoljnog likvidacionog postupka u skraćenom postupku.

(2) Uz prijedlog iz stava 1 ovog člana prilaže se:

- odluka o dobrovoljnoj likvidaciji u skraćenom postupku,
- notarski ovjerenu izjavu ortaka, članova ili dioničara da su izmirene sve obaveze prema povjeriocima, uključujući obaveze prema radnicima i da se slažu s time da bude sproveden skraćeni dobrovoljni likvidacioni postupak,
- aktuelni izvod iz sudskog registra,
- potvrdu Centralne banke ne stariju od osam dana od dana podnošenja prijedloga za pokretanje skraćenog dobrovoljnog likvidacionog postupka,
- uvjerenje Porezne uprave o izmirenim poreznim obavezama ne starije od 15 dana od dana podnošenja prijedloga za pokretanje skraćenog dobrovoljnog likvidacionog postupka,
- uvjerenje Uprave za indirektno oporezivanje o izmirenim indirektnim poreznim obavezama ne starije od 15 dana od dana podnošenja prijedloga za pokretanje skraćenog dobrovoljnog likvidacionog postupka,
- posljednji finansijski izvještaj sačinjen i prezentovan u skladu sa zakonom kojim se reguliše računovodstvo i revizija,

- h) izjavu ortaka, članova ili dioničara o popisu imovine s dokazima, uz prijedlog raspodjele imovine prema vlasničkim udjelima,
- i) dokaz o uplaćenim sredstvima na ime objave oglasa o donošenju rješenja o otvaranju i zaključenju likvidacionog postupka u „Službenom glasniku BiH“ i „Službenom glasniku Brčko distrikta BiH“,
- j) akt nadležnog organa kojim je dato ovlaštenje licu koje će preduzimati radnje i primati pismena u skraćenom dobrovoljnom likvidacionom postupku.

(3) Obrazac prijedloga za pokretanje skraćenog dobrovoljnog likvidacionog postupka i obrazac izjave iz stava 1 tačke b) ovog člana, za skraćeni dobrovoljni likvidacioni postupak propisuje se pravilnikom, koji donosi Pravosudna komisija.

Član 50

(Utvrđivanje ispunjenosti uslova)

(1) Nakon što sud utvrdi da su ispunjeni uslovi iz člana 49 ovog zakona, sud donosi rješenje o otvaranju i istovremenom zaključenju likvidacionog postupka, te po pravosnažnosti istog se nalaže brisanje društva iz registra.

(2) Rješenje iz stava 1 ovog člana se objavljuje na oglasnoj tabli suda, dok se oglas o donošenju rješenja o otvaranju i istovremenom zaključenju likvidacionog postupka objavljuje u „Službenom glasniku BiH“ i „Službenom glasniku Brčko distrikta BiH“, uz napomenu da je rješenje objavljeno na oglasnoj tabli suda u neprekidnom trajanju od 30 dana.

(3) Povjerioci i druga lica koja imaju pravni interes, mogu izjaviti žalbu u roku od 30 dana od dana objavljivanja u Službenom glasniku.

(4) Ako se na rješenje iz stava 1 ovog člana uloži žalba sud će staviti van snage rješenje u cijelosti i isto objaviti na oglasnoj tabli suda, dok se oglas o odluci suda objavljuje u „Službenom glasniku BiH“ i „Službenom glasniku Brčko distrikta BiH“, uz napomenu da je rješenje objavljeno na oglasnoj tabli suda u neprekidnom trajanju od 30 dana.

Član 51

(Nastavak redovnog likvidacionog postupka)

(1) Sud će nastaviti postupak po pravilima redovnog likvidacionog postupka, ako predlagač po pozivu suda uplati potreban iznos sredstava na ime predujma troškova postupka.

(2) Ako predlagač ne uplati predujam troškova sud će rješenjem pozvati zainteresovano lice (povjerioci i druge), koji su svoj interes iskazali u žalbi, da predujme sredstva na ime troškova postupka.

(3) Ako niko od pozvanih lica ne uplati predujam troškova sud će rješenjem prijedlog za pokretanje likvidacionog postupka odbaciti.

Član 52

(Odgovornost članova)

(1) Lica koja su dala ovjerenu izjavu iz člana 49 stava 2 tačke b) ovog zakona, odgovaraju neograničeno solidarno za obaveze pravnog lica tri godine nakon brisanja iz registra.

(2) Društvo koje prestaje po skraćenom postupku, briše se iz registra uz upisivanje u registar ličnih imena, jedinstvenog matičnog broja i adresa članova društva fizičkih lica, odnosno naziva, sjedišta i matičnog broja članova pravnih lica, s naznačenjem neograničene solidarne odgovornosti za obaveze brisanog društva, u roku iz stava 1 ovog člana.

Član 53

(Raspodjela likvidacione mase)

(1) Likvidaciona masa će se po pravosnažnosti rješenja iz člana 50 stava 1 ovog zakona raspodijeliti članovima prema vlasničkim udjelima.

(2) Ako su članovi donijeli odluku o raspodjeli likvidacione mase, raspodjela će se vršiti u skladu s odlukom o raspodjeli likvidacione mase.

DIO ŠESTI - LIKVIDACIONI POSTUPAK PO SLUŽBENOJ DUŽNOSTI

Član 54

(Tok postupka)

(1) Nakon dostave likvidacionom sudu rješenja kojim je utvrđen prestanak ili utvrđena ništavost upisa osnivanja poslovnog subjekta sud će u roku od 15 dana od dana prijema rješenja oglasom pozvati likvidacionog dužnika da u roku od 30 dana od dana objave oglasa obavijesti sud o imovini i ujedno pozvati povjerioci likvidacionog dužnika da u istom roku prijave svoja potraživanja uz navođenje pravnog osnova po osnovu kojeg su ta potraživanja nastala.

(2) Ako u roku iz stava 1 ovog člana likvidacioni dužnik ne obavijesti sud o imovini ili obavijesti da nema imovine ili da je ona neznatne vrijednosti i ako nema prijavljenih potraživanja prema likvidacionom dužniku, sud donosi rješenje kojim utvrđuje da se likvidacioni postupak neće provoditi i ujedno nalaže brisanje poslovnog subjekta iz sudskog registra nakon pravosnažnosti ovog rješenja.

(3) Rješenje se objavljuje na oglasnoj tabli suda i internet stranici suda. Objava ovog rješenja ima učinak dostave rješenja likvidacionom dužniku.

Član 55

(Prava i obaveze članova poslovnog subjekta nad kojim je utvrđen prestanak po službenoj dužnosti)

(1) Članovi poslovnog subjekta nad kojim je utvrđen prestanak po službenoj dužnosti mogu zatražiti da im sud, srazmjerno njihovom učešću u vlasništvu, prenese ostatak likvidacione mase poslovnog subjekta.

(2) Članovi poslovnog subjekta iz stava 1 ovog člana kojima je prenesen ostatak likvidacione mase poslovnog subjekta odgovaraju za obaveze poslovnog subjekta povjeriocima neograničeno solidarno svojom imovinom.

(3) Odgovornost prema povjeriocima iz stava 2 ovog člana prestaje protekom roka od tri godine od dana objave rješenja iz člana 54 ovog zakona.

(4) Nakon pravosnažnosti rješenja iz člana 54 stava 2 ovog zakona likvidacioni sud će dostaviti registarskom sudu, koji će na osnovu ovog rješenja izvršiti brisanje poslovnog subjekta iz sudskog registra.

(5) Ostaci likvidacione mase koji se u skladu s ovim članom ne prenesu članovima društva postaju vlasništvo Brčko distrikta BiH, ukoliko drugačije nije propisano posebnim propisom.

Član 56

(Nastavak postupka po opštim odredbama ovog zakona)

(1) Ako sud utvrdi da nisu ispunjeni uslovi za zaključenje likvidacionog postupka iz člana 54 stava 2 ovog Zakona, postupak likvidacije će se nastaviti u skladu s opštim odredbama ovog zakona.

(2) Prije nastavka postupka po opštim odredbama za provođenje likvidacionog postupka, sud će pozvati povjerioci koji su svoje potraživanje prijavili, da solidarno uplate predujam za pokriće troškova likvidacionog postupka u roku od 15 dana.

(3) Ukoliko povjerioci ne uplate predujam u propisanom roku, prijave potraživanja će se odbaciti, a postupak će se okončati u skladu s odredbom člana 54 ovog zakona.

(4) Povjerilac koji je predujmio troškove postupka ima pravo na njihov povrat, u postupku namirenja likvidacione mase. Troškovi koji su predujmljeni se namiruju prije namirenja potraživanja prijavljenih u likvidacionom postupku.

DIO SEDMI - OSTALE ODREDBE

Član 57

(Čuvanje poslovnih knjiga i dokumenata pravnog lica nakon brisanja)

(1) Poslovne knjige i dokumente poslovnog subjekta koje je brisano usljed likvidacije, čuvaju se u skladu s propisima kojima se uređuje arhivska građa.

(2) Troškovi arhiviranja namiruju se iz likvidacione mase.

(3) Ukoliko likvidacioni dužnik ne raspolaže sredstvima za pokrivanje troškova arhiviranja, arhivsku građu likvidacioni upravnik uručuje članu pravnog lica s najvećim učešćem u vlasničkim udjelima ili drugom članu pravnog lica.

(4) Zainteresovano lice ima pravo uvida u poslovne knjige i dokumente poslovnog subjekta o svom trošku.

DIO OSMI - PRELAZNE I ZAVRŠNE ODREDBE

Član 58

(Podzakonski propisi)

Pravosudna komisija će u roku od šest mjeseci od dana stupanja na snagu ovog zakona donijeti:

- Pravilnik o izgledu i sadržaju obrasca prijedloga za pokretanje likvidacionog postupka i o izgledu i sadržaju obrasca prijedloga za pokretanje skraćenog dobrovoljnog likvidacionog postupka i izjave članova društva;
- Pravilnik o naknadama i nagradama za rad likvidacionog upravnika.

Član 59

(Započeti postupci)

Likvidacioni postupci koji su započeti do dana stupanja na snagu ovog zakona, okončat će se po odredbama zakona koji je bio na snazi u vrijeme njihovog pokretanja.

Član 60

(Prestanak važenja ranijeg Zakona)

Stupanjem na snagu ovog zakona prestaje da važi Zakon o stečaju, prinudnom poravnanju i likvidaciji u Brčko distriktu BiH („Službeni glasnik Brčko distrikta BiH“, br. 1/02).

Član 61

(Stupanje na snagu)

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-650/19
Brčko, 19. 6. 2019. godine

**PREDSJEDNIK
SKUPŠTINE BRČKO DISTRIKTA BIH**
Esed Kadrić, s. r.

236

Na osnovu člana 31 stava 1 tačke n) Poslovnika o radu Skupštine Brčko distrikta BiH – prečišćeni tekst (Službeni glasnik Brčko distrikta BiH, broj 54/18), donosim

ODLUKU

O PROGLAŠENJU ZAKONA O STEČAJU

Član 1

Proglašavam Zakon o stečaju, koji je usvojila Skupština Brčko distrikta BiH na 51. redovnoj sjednici održanoj 19. juna 2019. godine.

Član 2

Ova odluka bit će objavljena u Službenom glasniku Brčko distrikta BiH.

Broj: 01.1-02-99/19
Brčko, 19. 6. 2019. godine

**PREDSJEDNIK
SKUPŠTINE BRČKO DISTRIKTA BIH**
Esed Kadrić, s. r.

Na osnovu člana 22 Statuta Brčko distrikta Bosne i Hercegovine – prečišćeni tekst (Službeni glasnik Brčko distrikta Bosne i Hercegovine, broj 2/10), Skupština Brčko distrikta Bosne i Hercegovine, na 51. redovnoj sjednici održanoj 19. juna 2019. godine, usvaja

ZAKON O STEČAJU

DIO PRVI OSNOVNE ODREDBE

Član 1

(Predmet Zakona)

Ovim zakonom uređuju se predstečajni postupak i stečajni postupak, pravne posljedice otvaranja i provođenja predstečajnog postupka i stečajnog postupka, reorganizacija stečajnog dužnika nesposobnog za plaćanje na osnovu stečajnog plana i međunarodni stečaj.

Član 2

(Definicije pojmova)

Izrazi i pojmovi upotrijebljeni u ovom zakonu imaju sljedeće značenje:

- stečajni postupak je posebna vrsta građanskog sudskog postupka koji sud provodi radi utvrđivanja da li su ispunjeni zakonom propisani uslovi za otvaranje stečajnog postupka nad određenim subjektima i prikupljanja i unovčavanja cjelokupne imovine stečajnog dužnika da bi se obezbijedilo grupno i srazmjerno namirenje svih njegovih povjerilaca,
- predstečajni postupak je sudski postupak koji sud provodi prije pokretanja i vođenja stečajnog postupka radi finansijskog i operativnog restrukturiranja dužnika,
- finansijsko i operativno restrukturiranje je postupak koji vodi sud u cilju zaključenja sporazuma u predstečajnom postupku, između povjerilaca i dužnika o načinu namirenja potraživanja povjerilaca radi poboljšanja likvidnosti i solventnosti dužnika,
- povjerenik je operativni organ u predstečajnom postupku, koga imenuje stečajni sudija iz reda stečajnih upravnika,
- predlagač je lice koje je podnijelo prijedlog za pokretanje predstečajnog ili stečajnog postupka,
- dužnik je pravno lice ili dužnik pojedinac nad kojim se vodi predstečajni postupak i nad kojim je pokrenut prethodni stečajni postupak,
- stečajni dužnik je pravno lice ili dužnik pojedinac nad kojim je otvoren i vodi se stečajni postupak,
- stečajni povjerioci su lični povjerioci dužnika koji u vrijeme otvaranja stečajnog postupka imaju neko imovinsko i pravno potraživanje prema njemu,
- izlučni povjerioci su lica koja imaju pravo, na osnovu svog stvarnog ili obligacionog prava, tražiti da se neki predmet (stvar ili pravo) izdvoji (izluči) iz stečajne mase zato što ne pripada stečajnom dužniku,
- razlučni povjerioci su povjerioci koji imaju pravo na odvojeno namirenje svojih potraživanja iz određenih dijelova stečajne mase,
- povjerioci stečajne mase su sva lica koja su poslovala sa stečajnim dužnikom i za stečajnog dužnika tokom stečajnog postupka,
- stečajni sudija je sudija nadležnog suda i organ stečajnog postupka koji provodi stečajni postupak nad stečajnim dužnikom,
- privremeni stečajni upravnik je organ prethodnog stečajnog postupka, koga imenuje stečajni sudija sa zadatkom da obezbijedi imovinu dužnika i utvrdi da li postoje razlozi za otvaranje stečajnog postupka,
- stečajni upravnik je organ stečajnog postupka koji, pod nadzorom stečajnog sudije, obavlja poslove organa stečajnog dužnika, prikuplja i unovčava imovinu stečajnog dužnika, te priprema i provodi namirenje povjerilaca,
- skupština povjerilaca je najviši organ povjerilaca koji odlučuje o najvažnijim pitanjima stečajnog postupka,
- odbor povjerilaca je organ stečajnog postupka koji u stečajnom postupku zastupa interese povjerilaca,
- stečajna masa je cjelokupna imovina koja pripada stečajnom dužniku u vrijeme otvaranja stečajnog postupka, kao i imovina koju stečajni dužnik stekne tokom stečajnog postupka, ako drugim propisima nije predviđeno drugačije,

